



Opis posla mentorice

“Izrazi koji su radi preglednosti dati u jednom gramatičkom rodu u ovom dokumentu se bez diskriminacije odnose i na muškarce i na žene.”

Pozicija: Mentorice za implementaciju petomjesečnog programa osnaživanja žena s invaliditetom u pet različitih regija u Bosni i Hercegovini u kojima djeluju koalicije OOSI iz MyRight programa u projektu osnaživanja žena “Ovdje sam - vidljiva i ponosna” (14104)

Period: januar – maj 2022

Tip ugovora: Ugovor o djelu

Supervizorice: MyRight koordinatorice i eksterna konsultantica za program mentorske podrške

O MYRIGHT-U

MyRight – Empowers people with disabilities je švedska je nevladina organizacija koja okuplja organizacije osoba s invaliditetom s ciljem sprovođenja programa podrške organizacijama osoba s invaliditetom širom svijeta, ali i korisnicima i korisnicama programa za osobe s invaliditetom. Trenutno MyRight implementira međunarodne programe podrške koji se implementiraju u Boliviji, Bosni i Hercegovini, Gani, Namibiji, Nepal, Nikaragvi, Ruandi, Šri Lanki i Tanzaniji.

MyRight-ova vizija je svijet u kojem sve osobe s invaliditetom uživaju jednaka prava i mogućnosti dostojanstvenog života bez siromaštva u inkluzivnim društvima.

Cilj rada MyRight-a u Bosni i Hercegovini je jačanje kapaciteta osoba s invaliditetom i njihovih organizacija da se efikasno zalažu za prava osoba s invaliditetom i osnažuju članove i članice svojih ciljnih skupina. Kao dio programa izgradnje kapaciteta MyRight također koordinira projekte koje finansiraju različiti donatori.

O PROJEKTU “OVDJE SAM – VIDLJIVA I PONOSNA”

Projekat “Ovdje sam – vidljiva i ponosna” (14104) se realizuje u okviru MyRight programa zajedničkih aktivnosti u BiH, a finansira ga Švedska agencija za međunarodnu razvojnu saradnju Sida koju predstavlja ambasada Švedske u Bosni i Hercegovini.

Sveobuhvatni cilj projekta je povećana implementacija prava žena i djevojaka s invaliditetom u Bosni i Hercegovini.

Doprinos ostvarenju ovog cilja se ostvaruje kroz povećano i aktivno uključivanje žena s invaliditetom koje su do sada bile izolirane i isključene odnosno neaktivne iz različitih razloga te nisu bile dovoljno upoznate sa ljudskim pravima i ulogom organizacija osoba s invaliditetom (OOSI) ili su bile samo pasivne članice organizacije osoba s invaliditetom.



Uključenjem u rad organizacija osoba s invaliditetom, žene s invaliditetom će dobiti priliku da se bolje upoznaju sa svojim pravima kao i sa značajem i načinima zagovaranja za svoja prava i implementaciju aktivnosti koje se prepoznaju kao zajednički interes. Uključenje žena s invaliditetom u organizacije osoba s invaliditetom i procese zagovaranja je od velikog značaja jer će omogućiti njihov aktivan i direktan uticaj na procese donošenja odluka koje mogu da utiču na njihove živote. Aktivno učešće žena s invaliditetom u organizacijama takođe osigurava smanjenje rizika od mnogostrukih oblika diskriminacije kojima su žene s invaliditetom evidentno više izložene od muškaraca ili žena bez invaliditeta. Kako bi se žene s invaliditetom potakle i osnažile da se uključe u OOSI te kako bi razvijale odnose zasnovane na zajedničkim interesima i ciljevima sa drugim članicama i članovima OOSI, povećale samopouzdanje i samosvijest o svojoj važnosti i vrijednosti, osmišljen je program mentorstva kao dio ovog projekta.

SVRHA ANGAŽMANA I OPIS ZADUŽENJA MENTORICE

Svrha – uloga mentorica

Mentorice će biti edukatorice, savjetnice i motivatorice djevojkama i ženama s invaliditetom koje se dobrovoljno priključe programu mentorske podrške. Planiran je angažman pet mentorica u pet regija: dobojskoj, bijeljinskoj, tuzlanskoj, sarajevskoj i hercegovačko–neretvanskoj. Svaka mentorica će sarađivati sa 12 žena i djevojaka s invaliditetom, slijedeći jasne korake definisane mentorskim programom.

Mentorice će imati priliku da sa korisnicama mentorskog programa kreiraju snažnu grupu ženskih glasova koje će imati priliku da zajednički rade na jačanju vlastitog samopouzdanja kao i znanja o ulozi organizacija osoba s invaliditetom.

Program mentorske podrške je proces rasta i razvoja za sve osobe koje u njemu učestvuju.

Ciljevi mentorskog programa

Generalni cilj programa mentorstva je izgradnja partnerskih odnosa u kojoj već osnažene i aktivne žene s invaliditetom pružaju savjetodavnu, edukativnu i motivacijsku podršku ženama kojima je ta podrška potrebna i koje do sada nisu bile aktivno uključene u pokret osoba s invaliditetom, kako bi doprinijele izgradnji i razvoju njihovih kapaciteta.

Specifični ciljevi mentorskog programa:

- Pružiti podršku ženama s invaliditetom koje do sada nisu bile uključene u programe osnaživanja da unaprijede svoja znanja, vještine i kompetencije kako bi dosegle svoj puni potencijal i ostale motivirane članice pokreta osoba s invaliditetom;
- Multiplicirati znanje i iskustvo žena s invaliditetom u BiH u svrhu osnaživanja drugih žena s invaliditetom u BiH, i jačanja pokreta osoba s invaliditetom;
- Uključiti ekspertice i inspirativne individue u program mentorske podrške unutar pokreta osoba s invaliditetom;
- Doprinijeti jačanju kapaciteta organizacija koje okupljaju osobe s invaliditetom u pet regija u BiH.



Očekivanja od mentorica

Od mentorica očekujemo posvećenost, pozitivan stav, moralnu podršku, spremnost da budu dobre slušateljice kao i spremnost da podijele svoja iskustva sa korisnicama programa mentorske podrške. Mentorice će izdvojiti potrebno vrijeme kako bi bile podrška za 12 korisnica mentorskog programa u svojoj regiji. Od mentorica se očekuje da u toku petomjesečnog programa održavaju sastanke uživo i online ukoliko situacija nametne ograničenja okupljanja, kao i da imaju telefonsku komunikaciju ili radionice sa korisnicama mentorskog programa u cilju osvještavanja interesa i potencijala, ali i izgradnje ličnih kompetencija koje mogu biti snažna pokretačka snaga za rad organizacija osoba s invaliditetom.

Mentorski program je prilagođen specifičnim potrebama žena s invaliditetom u BiH, predstavljen je kroz priručnik za mentorice koji je jednostavan, praktičan i inspirativan vodič kroz petomjesečni program. Ovaj priručnik će biti stavljen na raspolaganje ženama s invaliditetom. Cjelokupan program ne zahtijeva od mentorica mnogo vremena koje treba uložiti, nego je baziran na praktičnim alatima koje mentorica samostalno bira iz priručnika i uz podršku eksterne konsultantice, inkorporira u individualizirani plan svake korisnice programa mentorske podrške. Priručnik nudi niz predloženih aktivnosti, tema za razgovor i ideja kako motivisati korisnice da se osnaže, steknu ili povrate povjerenje u sebe i uključe u pokret i na taj način daju doprinos poboljšanju položaja osoba s invaliditetom u BiH.

Mentorice će, koristeći se definisanom metodologijom i ponuđenim alatima, ispitati interese korisnica i mapirati sve potencijale. Cijeli proces mapiranja će biti detaljno opisan u priručniku za mentorice i svaki korak mapiranja i planiranja aktivnosti za osnaživanje korisnica će biti koordinisan sa MyRight organizacijom i eksternom konsultanticom, a sve u skladu sa individualnim planovima korisnica.

Po odabiru mentorice za svaku regiju, planiran je jedan zajednički orijentacioni sastanak na kojem će se sve mentorice upoznati sa programom, priručnikom, dostupnim alatima i podrškom koja je na raspolaganju tokom kompletnog programa mentorske podrške.

Očekivani ishodi mentorskog rada

- **Oснаžene korisnice mentorskog programa** razumiju ulogu organizacija osoba s invaliditetom i pristupaju im kako bi radom u organizacijama osoba s invaliditetom proaktivno djelovale u oblasti zagovaranja za poboljšanje prava, uslova i kvaliteta života osoba s invaliditetom kroz jačanje znanja, vještina i kompetencija.
- **Izrađen kvalitetan individualizirani program** korisnica mentoringa u oblasti ličnih vještina, vrijednosti i interesa, umrežavanja, itd. na osnovu kojih se jačaju njihovi kapaciteti.
- **Unaprijeđeni kapaciteti mreže korisnica mentorskog programa za zastupanje prava osoba s invaliditetom**, kroz jačanje ličnih kompetencija u različitim oblastima i međusobnu razmjenu iskustava.

Koristi za mentorice

Mentorice su osnažene žene s invaliditetom ili žene bez invaliditeta koje se u svom profesionalnom angažmanu svakodnevno zalažu za poboljšanje statusa i životnog standarda osoba s invaliditetom, osobe koje aktivno učestvuju u radu organizacija osoba s invaliditetom i zajednici, ili imaju drugi profesionalni angažman u politici, biznisu, medijima, a spremne su podijeliti lična iskustva, znanja, kontakte, motivaciju i savjete na druge djevojke i žene.

Osim finansijske naknade za svoj angažman, mentorice će imati i sljedeće koristi:



- Učešće u kreiranju mreža djevojaka i žena u svojoj regiji sa kojima dijeli iste ciljeve, želje i vrijednosti, a koje joj u budućnosti mogu pomoći u radu, prikupljanju podataka, istraživanju i implementaciji različitih projekata;
- Unapređenje vještina liderstva i facilitiranja uz sticanja specifičnog iskustva kroz novi program mentorstva u BiH;
- Obezbjedeća podrška mentoricama od strane eksterne konsultantice u procesu osnaživanja korisnica mentorskog programa kroz učešće na sastancima i radionicama, aktivno korištenje priručnika za mentorice i svih ponuđenih alata, online komunikaciju sa konsultanticom u skladu sa potrebama mentorica i aktivno učešće u radu zatvorene Facebook grupe za podršku u procesu pružanja mentorske podrške.
- Doprinos stvaranju značajnih promjena u životima ljudi koje je politika ali i društvo stavilo na marginu;
- Učešće u kampanji kojom se promoviše značaj rada mentorica na jačanju žena s invaliditetom;
- Druženje i uvid u drugačije perspektive od interesa za mentoricu.

Uslovi angažmana

Pravo apliciranja imaju žene s invaliditetom, a ukoliko ne bude dovaljan broj kvalificiranih žena s invaliditetom koje se jave na ovaj poziv, u razmatranje će se uzeti i žene bez invaliditeta koje su profesionalno vezane za oblast poboljšanja životnog standarda i okruženja za osobe s invaliditetom, fizička lica, sa prebivalištem u BiH.

Prednost pri selekciji će takođe imati žene iz regija Doboje, Tuzla, Bijeljina, Sarajevo i Mostar.

Potrebno znanje i iskustvo za poziciju:

- Izražene komunikacijske kompetencije;
- Upoznatost sa ljudskim pravima osoba s invaliditetom kao i sa situacijom poštovanja ljudskih prava žena s invaliditetom u BiH;
- Razumijevanje i posvećenost principima UN Konvencije o pravima osoba s invaliditetom;
- Osnovna IT pismenost;
- Iskustvo u radu organizacije osoba s invaliditetom;
- Iskustvo u kreiranju i/ili implementiranju različitih programa za osobe s invaliditetom kao što su u vidu edukacija, radionica, inspirativnih govora;
- Iskustvo u radu sa grupama i vođenju sastanaka;
- Iskustva u radu na pitanjima od interesa za osobe s invaliditetom u BiH;

Slanje aplikacije

Rok za dostavljanje elektronske aplikacije je **do 14.00 sati u utorak, 9.11.2021. na email: info@myright.ba**

Aplikacija treba da sadrži:

1. Životopis (CV) kandidatkinje
2. Tri reference (imena i podaci za kontakt) kojim se dokazuje traženo iskustvo
3. Motivacijsko pismo kojim se detaljno predstavlja lična motiviranost za učešće u mentorskom programu

Kontaktirat ćemo samo kandidatkinje koje zadovolje tražene kriterije i uđu u uži izbor.